

ADVIS AVX

FRANCOIS DE LA
RESOLUTION PRISE AVX
Estats de Bloys , contre Henry de
Bourbon, soy disant Roy de Nauarre.

Extraict des Registres des Estats.



A L Y O N,

L'an mil cinq cents quatre vingts & neuf.

ADVIS A VV

Case

F

39

.326

158924

THE NEWBERRY
LIBRARY





ADVIS AVX FRAN-
çois de la resolution prise aux
Estats de Bloys, contre Henry de
Bourbon, soy disant Roy de Na-
uarre.



ESSIEURS nous auons
iuste occasiõ de recognoi-
stre que la puissance & au-
thorité des Roys vient de
Dieu, pour estre seulemẽt
ministres de son regne, &
exercer sa iustice en terre. Que s'ils se
deuoient du droict sentier de ses sain-
ctes volontez, il est terrible en ses iuge-
mens, il oste l'esprit & la vie, il change
les Royaumes, & transfere les couron-
nes, il est seuer iusticier qui a l'œil ouuert
sur les œuures & sur les passions des hõ-
mes, pour les chastier lentement, & d'un

pied tardif: mais le delay de sa iustice, &
 la longueur de ses remises, fait sa puni-
 tion plus griesue, & la rend plus admira-
 ble. C'est maintenant que la France le
 voit & experimente, par la mort d'Hen-
 ry de Vallois miraculeusement aduenue:
 Car apres auoir indignement regné l'es-
 pace de quinze ans, ruiné son peuple, &
 trompé ses subiects, par Edicts iniques,
 imposts prodigieux, cruelles exactions,
 profuses prodigalitez, assassins horribles,
 periuremets publics, infames pollutions,
 prostitutiōs forcees, & autres crimes de-
 testables, couuerts & masquez d'un faux
 visage de Penitent, de Pelerin, de Hie-
 ronomite, & saintes deuotions: il est mis
 par terre, son orgueil est abatu, les flam-
 mes de sa vengeance estaintes, & sa
 puissance perdue en vn moment, par le
 plus foible de ses subiects.

C'est vne faueur du ciel, & coup mi-
 raculeux, qu'un pauvre religieux, nourry
 à l'ombre d'un cloistre, à la poudre d'une
 classe, à la crainte d'une escolle, le plus
 simple de ses compagnons, ayt eu tant de
 courage, de force & hardiesse, pour seul
 venger la querelle de Dieu, deffendre
 son

son Eglise, ramener la liberté aux François, & mettre fin à la tyrannie formée, au peril de sa personne & sacrifice de sa vie.

Coup à la verité miraculeux par toutes circonstances & obseruations des personnes, du lieu, & du temps. Qui est le braue soldat & hardy guerrier qui ne se fust estonné de l'entree d'un cabinet fraichement ensanglanté par le cruel assassin d'un prince des plus genereux du monde? Qui n'eut eu peur de se presenter à la veüe & regards farouches, aux mains furieuses & dagues mortelles des quarante cinq bourreaux de la France, de passer par vne armee puissante, s'hasarder à la mercy des soldats, & se commettre en vn lieu où l'horreur & la crainte de la mort habitoyent. Il falloit bien que l'esprit de Dieu fut guide de son chemin, & qu'il eut graué dans son cœur la fermeté d'un glorieux Martyr: veu que ce bon Religieux arriua au port Saint Cloux le dernier iour du mois de Iuillet, y passa la nuit entiere, y demeura iusques sur les dix heures du matin du premier iour d'Aoust. Le temps estoit asses long

pour estre agité de diuerſes opinions, auoir mille trauerſes dans l'ame, mille apprehenſions de la mort, mille craintes d'un ſupplice prompt & cruel, & avec ſi durs affaux autant de fois chāger d'auis. Mais les conſeils de Dieu ſont certains, & ſes iugements ineuitables : c'eſt vn ſouuerain medecin qui ſcait bien l'heure de la ſaignee, la neceſſité de la purgation, l'opportunité des remedes, & la propriété de ſes drogues.

Le premier iour d'Aouſt eſtoit la feſte S. Pierre: à ce meſme iour l'on recognoît la vertu de ſes ſucceſſeurs, & l'autorité du ſainct Siege, duquel procedoit la censure & bulle ſolennelle peu auparauant iuſtement fulminee contre Henry de Vallois. La feſte a eſté inſtituee en ſouueraince de ce que Sainct Pierre auoit eſté miraculeuſemēt deliuré des liens du vilain Herodes: à ce meſmes iour les François furent deliurez des liens de la tyrānie, & remis en la iouiſſance de leurs premiers droicts.

L'excommunication eſt vn glaiue ſpirituel en l'Egliſe, pour abbaiffer & abatre l'orgueil de ceux qui s'eſleuent cō-

tre la puissance legitime des Papes, & se-
 rient de la force de leurs clefs : que l'on
 remarque auoir esté apportee en Fran-
 ce par Frere Iaques de Diou, Cheualier
 Maltois, ambassadeur de l'Vnion, autant
 zelé à sa religion, qu'il est recommanda-
 ble en integrité. Et despuis vn autre Ia-
 ques a vsé & s'est serui à propos du glai-
 ue materiel. L'vn a donné la mort de
 l'ame, l'autre celle du corps. Il estoit na-
 tif d'un village appellé Sorbonne : ausly
 auoit la Sorbonne de Paris donné les
 premiers aduis de l'excommunication.
 Son furnom estoit Clement, affin de re-
 cognoistre les effects d'une clemence di-
 uine au temps que l'Eglise estoit plus tra-
 uaillee, & nostre repos plus troublé par
 vn Roy qui ne respiroit pendant le bref
 delay de sa blesseure mortelle, que cor-
 roux, vengeance, sang, feux, flammes, &
 fer contre les Catholiques de l'Vnion, &
 principales villes de son Royaume: & le-
 quel en l'ardeur de sa colere rendit l'a-
 me, peu aymé, & beaucoup craint.

L'on ne dira pas que ce soit vn coup
 préparé par le conseil d'autrui, par or,
 argent, honneurs, & par corruptelle d'au-
 tres

tres belles promesses. La mendicité, la besasse, & le vœu de pauvreté, excusent assez ce bon religieux, & couurent le blâme de telles calomnies.

Toutes impostures cesseront quand l'on considerera que sa recompense ne pouuoit estre que la perte de sa vie : & son salaire, la peine d'un grief torment & supplice exemplaire. L'esperance d'une fuite, la course d'un cheual, le secret de quelques pratiques, la force de ses mains, la valeur de ses armes, ne fauorifoyent en rien son entreprise. Car il vint à pied, sans autre corcelet que son froc, en un lieu gardé par François, par Escossois, & Suisses, où de tous costés les quarante cinq coupe-iarrets estoient en sentinelles, où les courtisans faisoient presse, où les mignons veilloient, & où la mort estoit infaillible.

Il faut doncques sans passion iuger le coup miraculeux, & qu'il soit d'un chacun aduoué, publié, & recogneu coup de Dieu. Pourquoy ne fera il permis d'ainsi parler? veu qu'apres les barbares assassins, commis à Bloys, les Huguenots & Politiques chatoient par forme de triumphes
que

que c'estoyent coups de Roy. Vn si haut miracle estant aduenü en nos iours doit auoir de grāds & miraculeux effects. Car Dieu n'opere pas avec si profonds misteres & terribles changements, que ce ne soit pour le repos, ou pour la ruine entiere de son peuple. Il nous faut croire que c'est vn signe du ciel pour frapper viuement nos cœurs, ouurir nos esprits, & reueiller nos sens, dez si long temps charméz & endormis, pour en ce temps resister à l'effort violent des ennemis de nostre foy, purger la France du venin qui s'y glisse, & la nettoyer de l'air contagieux qui l'infeste par la peste des Heretiques, & par la dissimulation des ambitieux Politiques.

C'est maintenant que les vents sont desbordez, que la tempeste est leuee, les flots esmeus, & le naufrage biē prochain, si nous ne nous ancrons forts & fermes contre l'impetueux orage de l'Heresie. C'est maintenant que la Religion Catholique aura les plus grandes secousses, où l'estat à demy penchant sera du tout par terre, & où la France apres ses longues maladies rendra l'esprit, si les bons

& vrais Catholiques ne s'vnissent en-
semble, & par vne charitable reconcilia-
tion ne s'accordent à combattre les He-
retiques & leurs associez. Nous en auons
les remedes prompts, & en main, il ne re-
stera qu'à nous d'en vser. Or les meil-
leurs moyens, & les plus solides con-
seils, pour appaiser les troubles, nous tirer de
la tempeste, sauuer la barque, & nous
mettre à port, ne sont autres, que de se
bander & affermir cōtre Henry de Bour-
bon soy disant Roy de Nauarre, luy rom-
pre ses desseins, & luy empescher l'vsur-
pation de la couronne. Le zele de nostre
Religion nous le commande, le serment
de nostre baptesme nous y lie, & nostre
debuoir nous y appelle. Car nous sca-
uons tous qu'il est Heretique, chef &
protecteur des Calvinistes, ennemy iure
de l'Eglise Romaine, & excommunié pu-
blic. Nous n'ignorons pas les reiterees
abiurations de la Religion Catholique,
faictes en la ville de Montauban. Nous
experimentons que depuis vings ans il
fait la guerre à l'Eglise, qu'il ruyne les
autels, brusle les monasteres, profane
les sanctuaires, & saccage les villes. La fu-
mee

mee de ses feux est encores en l'air, & les
 cendres toutes chaudes: les sacrileges de
 Cahors, le carnage de la bataille de Cou-
 tras, ses impietez & cruautez contre les
 prestres de Poictou crient vengeance à
 Dieu & aux hommes. En quel piteux
 estat a il reduit la Guyenne? comme a il
 rauagé les premieres Prouinces de Fran-
 ce? combien de fois a il fait descendre
 l'estranger? Ne print il pas l'année passée
 au mois de Decembre la ville de Nyort,
 où pour son entree il fist pendre le Lieu-
 tenant ciuil, l'un des meilleurs Catholi-
 ques du pays? n'a il pas bannye la Messe
 de ses terres, & planté le Calvinisme aux
 pays de son obeissance? Et vous le vou-
 lez aduouer pour successeur, & recognoi-
 stre pour Roy? O gens stupides & insen-
 sez! Vous n'estes Chrestiens ny François
 de soustenir son party, & fauoriser sa cau-
 se: Car c'est vne maxime certaine, & par
 experience recogneüe veritable, qu'un
 Heretique ne peut & doibt regner entre
 des subiects Chrestiens & Catholiques:
 non plus que suyuant le propos doré de
 Iouinian esleu à l'Empire apres Iulian
 l'Apostat, vn Empereur Chrestien ne

doibt commander qu'à des foldats, & fubiects Chrestiens comme luy: de craindre que par l'ordure de l'heresie, la pureté de la religion Chrestienne ne soit contaminée, & peruertie: estant ordinaire que le leuain euanté gaste la bonne paste, & le peu d'yuraye corrompt la tisse du pur grain.

Epist. 48. Ceux qui doutent de ceste proposition & qui soustiennēt le paradoxe contraire, ont plus besoing de sens & entendement, que de raison, exemple, ou discours. Qu'ils prennent le loisir de lire S. Augustin *, Theodoret, Socrate, Eusebe, Sozomene, Zonare, & Nicephore, ils apprendront que le seul & principal but de tous les bons Empereurs a esté d'exterminer le Paganisme, chasser l'heresie, combattre toutes sectes, esteindre les factions, & purger les opinions contraires à l'ynité de l'Eglise Catholique & Romaine. Que si la doctrine des anciens Peres ne les contente, ou que la lecture des saints escrits soit trop longue, qu'ils lisent ce que doctement a esté traité & recueilly par feu Mōsieur Begat Prēsident au Parlement de Diion aux remonstres

ces par luy faictes au feu Roy Charles
neufiesme pour empescher en Bourgon-
gne la publication & execution du per-
nicieux Edict de Ianuier : qu'ils ayent en
main les discours du Catholique An-
glois, & du Catholique François, vrais
& certains pronostics de nostre ruine
commune, si nous nous laissons esbran-
ler : qu'ils voyent le riche & sçauant dis-
cours du Panegiric de l'Edict d'Vniõ de
Monsieur du Laurens, & qu'ils feuilletent
le liure de Monsieur Boucher, ils y trou-
ueront assez dequoy pour eschauffer les
plus froids Catholiques, asseurer les dou-
teux, conuaincre les opiniaistres, contèn-
ter les sçauans, instruire les ignorans, &
confirmer les bons en la verité de la pro-
position cy deuãt entamee: Que ce n'est
point viure en Chrestien que de dissi-
muler & souffrir qu'un heretique prenne
pied au Royaume.

Je vous ay dict aussi que ce n'estoit
estre François: parce que le premier fon-
dement de l'Estat, la plus riche parure
de la France, la plus precieuse perle de la
couronne, la seule prerogatiue du sce-
ptre, est la seule Religion Catholique &

*De iusta
Henr. iij. è
regno Frãc.
abdicat.*

Romaine: aux raions de laquelle la France sur toutes autres Monarchies a esté tousiours reluifante, claire en deuotion, nette en pieté, inuiolable & constante en sa foy, exempte de monstres, fauorisee du ciel par grace speciale, & miraculeusement enrichie d'une celeste onction pour le sacre de ses Roys: lesquels en recognoissance de tant de bienfaits, ont de ligne en ligne despuis Clouis fait reluire leurs armes, & transmis à leurs successeurs par droit hereditaire le titre de Treschrestiens, par les belles victoires qu'ils ont obtenues contre les Albigeois, Gots, Vvandalles, Lombards, Sarrazins, Huguenots, & autres Heretiques. De là vient que pour la parfaicte & legitime succession au Royaume, deux qualitez sont conioinctement requises au temps de l'escheute de la couronne. Que le Prince succcessible soit nourry, instruit, & bien confirmé en la seule, & vraye Religion Chrestienne, sans tache quelconque d'heresie, & que d'ailleurs il soit le plus prochain du sang Royal, sans representation. Mais la premiere qualité est de tât plus necessaire qu'elle procede de Dieu

Dieu , & qu'elle a vn ſuieſt plus beau & immortel, qu'eſt l'ame: de ſorte que comme les loix diuines & eternelles doyuent eſtre plus religieusement gardees , que celles des hommes transitoires, muables, & incertaines : il faut faire plus grand eſtat de celles qui regardent le ſpirituel, que d'une loy Salique, qui regarde le temporel. Auſſi eſt il accouſtumé en la ceremonie du ſacre de nos Roys , que la Meſſe commencee, auant que de lire l'e-piſtre , l'Archeueſque de Rheims interprete & fait entendre les articles & myſteres de la foy Chreſtienne, interroge le Roy ſ'il les croit, & veut deffendre. Comme eſt il doncques poſſible que celui qui hayt & blaſme la Meſſe, qui ſe rit des ceremonies de l'Egliſe , qui blaſpheme contre le ſacrement de l'autel, qui neglige les ſainctes traditions, qui meſpriſe les dignitez & perſonnes des Archeueſques, & tout l'ordre Eccleſiaſtique, puiſſe eſtre Roy de France? C'eſt pourquoy à bon droit l'Edict d'Vnion exclud & rend incapables du Royaume les Heretiques, adherants & fauteurs d'iceux. Edict le plus ſolennel qui fut oncques dicté de la
bo uche.

bouche du saint Esprit, iuré par le feu Roy sur le corps de Dieu, publié par les Parlemēts, enregistré aux sieges Royaux, receu en toutes les villes, passé en loy fondamentale : & ceste loy de nouueau iuree, & confirmee par serment reiteré à trois diuerses fois, par le mesme Roy, à la face des Estats, authorisee de la presence & semblable serment des Princes, Seigneurs, & Officiers du Royaume, proclamée en l'assemblée des trois Ordres, avec louanges, graces, & resiouissances publiques. Tant de graues serments, belles promesses, & solennelles protestations inuiterent les Deputez de passer plus auāt, & preueoir à ce qu'estoit profitable au peuple & necessaire à l'Estat, pour de bonne heure assoupir les troubles, & esteindre les feux de si long tēps allumez par les iniustes armes du Roy de Nauarre, & l'empescher qu'il ne remua mesnage à l'aduenir, le Roy mourāt sans enfans. C'est à quoy tēd le suiet du present discours, estant mon intention de vous donner aduis, & faire entendre par le menu la verité des choses passees, & deliberations prises pour ce regard.

Sachant

Sachez doncques que le quatriesme du mois de Novembre 1588. l'article touchant le Roy de Nauarre fut entamé, & la proposition faicte en la chambre du Clergé, où apres grandes & meures considerations, il fut aduisé, qu'il seroit tenu pour criminel de leze Maïesté diuine & humaine, heretique, chef diceux, relaps, excommunié, priué du gouuernement de Guyenne, & de tous ses estats, indigne de toutes successions, couronnes, & Royaumes. Ce que seroit communiqué aux autres chambres.

Le mesme iour le propos en fut porté à ceux du tiers Estat par les sieurs Archeuesque d'Ambrun, Euesque de Bazas, Abbé de Cysteaux, & autres signalez personages de l'Eglise, lesquels declarerent estre chargez d'en faire pareille ouuerture à Messieurs de la Noblesse.

Le lendemain cinquiesme les trois ordres apres vne grande & mutuelle conference, se trouuerent de mesme aduis, & delibererent de deputer douze de chacune chambre pour faire entendre leur resolution au Roy.

Cela fut aussi tost executé, & le propos dignemēt tenu au nom de tous les Estats par le Sieur Archeuesque d'Ambrun, Prelat honorable & bien zelé.

Le Roy fit responce que l'on mist en termes, & que l'on eust à examiner, s'il estoit bon & expediēt de sommer le Roy de Nauarre pour vne derniere fois à iurer l'Edict d'ynion, & se declarer Catholique. Et toutesfois ne pensez pas, dict il, que ce soit pour le rendre habile à me succeder. Car quand Dieu ne me donneroit lignee, ie pouruiroy en telle sorte à mon Royaume, que iamais Roy ayant esté Heretique ne vous gouuernerait. Ce que ie veux estre raporté en vos Chambres. Voilā ses propres mots fidellement retenus & rapportez.

Le lundy septiesme l'on delibere aux trois Chambres sur la responce du Roy: l'on considere de pres ce qu'auoit esté fait du passé pour gagner le Roy de Nauarre, & le mettre au droit chemin: que la Royne mere y auoit fait voyage, que les Estats premiers tenus à Blois y auoient enuoyé: que messieurs de Sainte Foy, de Saint Germain, & le Pere Maldo-

Maldonat auoyent fait tout debuoir de l'instruire : que nostre Sainct Pere luy auoit vne fois pardonné : que despuis il estoit recheu, pire que iamais: qu'en pleine assemblee des Heretiques il auoit inree leur manutention: qu'il estoit en campagne, les armes en main contre les Catholiques: qu'il exerçoit à la face des Estats des cruautez horribles: qu'il estoit possédé par des Ministres: que l'on auoit esté contraint de mettre aux champs vne armee pour empescher ses hostilitez: qu'il auoit esté suffisamment sommé & inuité par l'Edict d'Vnion publié par tout le Royaume: qu'il estoit excommunié: que l'Eglise contreuiendrait à ses saincts decretz de le recognoistre & approcher. La peine de droit cōtre les relaps fut mise en auant, & ne fut riē oublié du merite del'affaire. L'importance de la question fut grande : mais l'assemblee des Estats estoit seule digne & capable pour la traiter & examiner selon son poix & mesure. En fin ceux du Clergé se resolurent qu'il ne se pouuoit & deuoit faire, que le Roy de Nauarre fust d'auantage contumacé. Leur conclusion fut portée en la

chambre des Nobles par M^onsieur l'Euesque de Chaalon en Champagne, & au tiers Estat par monsieur l'Euesque de Comminges. Il se trouua que les trois Chambres estoient de mesme aduis & en deliberation d'en aduertir le Roy.

Le huitiesme du mois le sieur Archeuesque d'Ambrun, accompagné de douze de chacun ordre, rendit la responce au nom des Estats. A l'entree d'apres disné Maistre Iean Saunier depute du Charollois, present au propos dudit sieur d'Ambrun, fit son rapport au tiers Estat, & declara que le Roy auoit prises de bonne part les remonstrances des Estats, lequel auoit respondu qu'il scauoit bien que le Roy de Nauarre estoit Heretique, indigne de la couronne, qu'il estoit bien la resolu qu'il n'y auroit iamais part: de quoy il vouloit les cayers estre chargez & remplis, deliberat de satisfaire & contanter les Deputés, sans qu'il fust besoin de plus grande poursuite, veu la sainte resolution.

Le mercredy neuuiesme vint en la chambre du tiers Estat monsieur l'Euesque de Sarlat de la part du Clergé, lequel

quel fit scauoir qu'ils estoient bien assurez de la bonne volonté du Roy, & qu'il n'en falloit point douter : partant que ceux de son ordre se contentoyent de dresser article par escrit qui contiendroient la resolution prise le quatiésme du mois de Nouembre, en la forme cy deuât rapportee, pour presenter l'article des premiers du cayer general. Cela fut ainsi conclud & arresté en toutes les Chambres.

Despuis le mesme article fut confirmé en la châtre de la conference qui se faisoit aux Iacobins, où de chacun ordre se trouuoient douze Deputez, pour en vn seul cayer rediger les articles qui seroient conformés. Mais quel plus grand tésmoignage voulez vous de la volonté du feu Roy pour passer & aduoër cest article que ce qu'il dist & protesta solennellement aux sieurs President de Nully, & Aduocat Bernard, le neuuiesme du mois de Decembre? Car luy estant, avec lesdits sieurs Deputez pour affaires qui regardoyent le grand party, & le bail de Dehere, il se mit en propos avec eux de son Edict d'Vnion, & en iurant son crea-

teur, qu'il disoit auoir receu le iour mesmes, il promit sur sa part de Paradis, & sur peine de damnation eternelle, au profond des enfers, avec les plus grâds damnés, qu'il ne contréuiendrait iamais à ses saintes promesses & resolutions. Que s'il auoit le poignard à la gorge, il aymeroit mieux mourir que d'auoir le Roy de Nauarre pour successeur, & faire trefues avec l'Huguenot: ayant fait expres commandement ausdicts Sieurs Deputés de faire entendre aux Chambres ses propos & serments. Le Sieur de Nully les rapporta au tiers Estat, & le Sieur Bernard fut chargé de les communiquer au Clergé & à la Noblesse. Le Roy auoit si peur que rien ne fust obmis de ce qu'il auoit dict, & tant de desir que son intention fust publiee, qu'il enuoya Monsieur le Merle en toutes les Chambres, pour sçauoir si le rapport en auoit esté fait, & que l'on creust ce que lesdicts Sieurs estoient chargés de dire de sa part.

Voudriés vous plus de preuue pour la condamnation du Roy de Nauarre, & de son incapacité? Vous dirés incontinent
que

que cela se faisoit ainsi du viuant de Mō-
 sieur de Guise, que son credit & authori-
 té causoyent telles resolutiōs: mais qu'a-
 pres sa mort la chance fut bien tournee.
 Vous vous trompés, Messieurs: Car ores
 que les proxenetes, ministres secrets, &
 sollicitours à gages du Roy de Nauarre
 eussent despuis remué toute pierre, pour
 effacer l'article & le tirer des cayers, ils
 perdirent leur peine. Les sieurs de Brissac
 & Aduocat Bernard en pourroient dire
 quelque chose, quand tous deux ensen-
 blément, & en vn mesme lieu ils furent
 inuitez d'en parler en leurs Chambres,
 par vn des premiers prelatz de la Fran-
 ce, premier en dignité non en Religion.
 Mais le bon homme s'adrescoit mal: il vit
 bien qu'il n'y auoit rien à gagner sur
 eux, & que comme luy ils n'auoient l'es-
 prit muable ny enflé de fumees de Cour.
 Les pratiques & menees des Biarnois fu-
 rēt aussi tost assouppies & dissipées qu'el-
 les eurent pris air, & que le bruit en fut
 ouy. Car monsieur l'Euesque de Sarlac
 ayant esté enuoyé aux Chambres, le
 vingtseptiesme de Decembre, pour re-
 cognoistre & sonder, si les grands chan-
 gements

gements auroient point changé le premier aduis de ceux de la Noblesse & tiers Estat, & les trouua constants & fermes en la resolution prise au mois de Nouembre, touchant le Roy de Nauarre. Et par effect les cayers des trois ordres furent reuestus & chargez de l'article en la mesme forme & substance, qu'il auoit esté auparauant accordé, & iceux presentez au Roy le Mercredy quatriesme de Ianuier de la presente année. Despuis le seiziesme du mois, apres la harangue du tiers Estat, l'Edict d'Vnion fut pour la troisiésme fois publié par le secretaire Rusé en pleine assemblée des Estats, iuré de nouueau par le Roy, avec solemnelle protestation de l'observer & faire entretenir pour loy fondamentale de l'Estat.

Voyez maintenant, Messieurs, & en sincerité de conscience iugez, quelle est la trahison, perfidie, iniustice desloyauté & aueuglement de ceux qui fauorisent & soustiennent pour Roy, celuy que les Edicts declarent indigne de la couronne, que les Parlements ont iugé incapable, que les Estats tiennent criminel de leze

leze Maiefté, que le feu Roy a defauoué pour fuccesseur, que l'Eglise a reprobé, que le Pape a condamné, & que les loix fondamentales du Royaume ont exclus. Voulez vous à ce coup faire banque-routte à la Religion? Aymez vous mieux que l'ambition & l'auarice vous perde, que la conscience vous sauue? Si vous estes Catholiques & François pourrez vous honnestement demander pour Roy celuy que Geneue demande, que l'Angleterre desire, que les Protestans souhaitent, que les Rochelois honnorent, & que tous les Heretiques deffendent?

Ce n'est pas au Clergé que mon propos s'adresse, parce que c'est le persecuteur de l'Eglise, & le grand ennemy des Prestres & Religieux. Que l'on demande à ceux du Poictou, de la Guyenne, de Perigort, de Quercy, du Xaintongeois, que sont deuenus leurs Curez, Docteurs, Chanoines, & autres Ecclesiastiques? Ils vous respondront que la plus part ont esté tuez & massacrez par le Roy de Navarre. Que sont deuenues les reliques, & ornemens de leurs autels? ils vous diront que tout a esté perdu, par les briganda-

ges, völlerries, & sacrileges de luy & de ses soldats. Il ne faut doncques rien craindre pour les Ecclesiastiques qui restent entiers, ils sont bienheureux d'estre sages au peril d'autrui.

Moins faut il douter de la meilleur partie du tiers Estat & de toutes les villes vnies : l'amour de leurs enfans, la chasteté de leurs femmes, la seurté de leurs biens, le repos de leurs familles, la fidele garde de leurs murailles, & les gages pretieux de leur foy & religion, leur sont trop cherement recombâdez pour en faire si bon marché, que de se fier aux fausses promesses d'un Heretique.

Qui sera doncques pour luy? Voulez vous faire tant de tort à la Noblesse, me dira quelque braue & genereux Gentilhomme, que de l'accuser de couardise au faict de la Religiõ? Certes i'ayme, ie loue, & respecte beaucoup ceux qui prennent cela au point de l'honneur. Mais le malheur est que nous en voyons & cognoissons plusieurs, lesquels oblieux de leur rang & deuoir, gaignez par mauuais conseils, poussez d'un pretexte de vengeance, remplis de vaines attentes & promesses

ses sont encores à cheual, & ont les armes au poing pour le party du Roy de Nauarre, contre le seruice de Dieu, de la vraye Religion, & de leur pays. Est-ce ainsi, Messieurs, que vous suyuez la vertu de vos Peres, & que vous prenez les faux sentiers pour vous perdre & esgarer du droict chemin qu'ils vous ont battu? Auez vous esté par eux nourris & esleuez, pour obscurcir la lumiere de leur pieuse memoire, & effacer l'honneur de leurs monumets? Voulez vous perdre & destruire en vos iours, ce qu'ils ont cherement acquis & conserué en leur vie? Ils ont montré iusques à la Palestine qu'ils ne portoyent l'espee pour autre vsage, que pour l'aduancement & deffence de la foy, & vous courez fortune pour la ruiner. Plusieurs d'entre vous ont leurs armoiries semées de croix, tesmoignage certain de la pieté & deuotion de vos ancestres, & vous suyuez celuy qui les fait abattre, qui reiette ceste liuree, & qui ne porte pas la casaque croisee. Si le faict de la Religion ne vous touche, ou que le meslange que vous faictes du reuenu des Abbayes & Prieurés avec vos biens & domaine or-

dinaire vous retienne: pensez du moins à vos premiers serments, & à la foy promise pour l'exécution de l'Edict d'Vnion. Vous estes si scrupuleux en vos promesses, si constants en vos parolles, & à la foy que vous donnés aux hommes, que quand vous iurés foy de Gentilhomme, vous voulés qu'un chacun vous croye: c'est le plus grand de vous serments: c'est à se couper la gorge si l'on manque de parole, voire pour choses de neant. Et à present qu'il y va de la foy donnée à Dieu, prestee à son Eglise, & à tous les Estats de la France, vous la voulés légèrement fausser, & iniurieusement la perdre, & violer? N'avez vous point peur que la peine d'une si estrange perfidie vous talonne de pres, & que la vengeance diuine ne vous abatte? Prenés instruction au chastiment d'autrui, & mirés vous à l'exemple miraculeux proposé au commencement de mon propos.

C'est vn poinct trop vulgaire, & propre d'une école, que de parler de la peine temporelle & eternelle du peürement: contentés vous de sçauoir & apprendre, que les anciens assembloyent

sur vn mesme autel la statue de la Foy avec celle d'un Iupiter foudroyant, pour monstrier que qui offensoit la foy, il auoit aussi tost la foudre sur la teste. Si ce grand Capitaine Alcibiades viuoit, il vous apprendroit vostre leçon, & vous feroit rougir de hôte, quelque Payen qu'il fust: car il auoit accoustumé de se resiouir quand les Barbares rompoient les premiers les tresues accordees sous leur foy, disant que la seule rupture de la foy & promesse, offensoit les Dieux, excitoit leur courroux, & les rendoit leurs ennemis.

Laissons là les anciens & les genereux faictz de vos ayeux, souuenés vous seulement du propos porté au nom de vostre ordre par Monsieur de Brissac, vostre sage President, vostre eloquent orateur & Pericles François. N'a il pas en public promis pour toute la Noblesse de France l'execution de l'Edict d'Vnion? Ne vous a il pas tous obligés à la guerre contre les Heretiques? N'a il pas recogneu ceux là indignes de la couronne, & subiects à punition, qui par leur fer, fureurs & rages ont voulu arracher du Royaume

l'vnique Religion ? N'a il pas dict que la troupe des preux Cheualiers demanderoit compte quelque iour, du zele & de la ferueur que vous deués à la deffense de l'Eglise ? N'a il pas confessé, que les vrayes marques de la Noblesse, & le seur chemin à la vertu, n'estoyent autres, que de mettre la main aux fondemens, aduancement & conseruatiō de la foy ? N'a il pas rendu iugement, qu'il ne falloit point recognoistre autres Gentilshommes François & compatriotes que ceux qui sont touchés de mesme desir ? Parla il pour lors si dignement, pour estre maintenant si indignement desauoué ? L'a ués vous choisi pour le dediré ? Il n'a rien fait & dict qui soit subiect à desauou, qui ne merite louange, & qui ne vous oblige à garder la parole qu'il a donnée pour vous, à suyure son aduis : à vous rendre à ses raisons, & vous tost despartir de vos factions & hostilités, pour en toute seurte & paix viure à la façon de nos Peres, en vne mesme Religion, & sous l'obeissance d'un Roy Treschrestien ? Aurés vous les esprits si perdus, que de negliger vn conseil qui vous est propre, vtil, honno

honorable à vostre rang, & asseuré pour vos consciences?

Quand il aduiendroit autrement, & que toute la France voudroit auoir pour Roy, le Roy de Nauarre (ce que Dieu ne permettra iamais) il faut que la Bourgogne seule y resiste, qu'elle tienne bon, & qu'elle soit ferme, que par son fel elle empesche la pourriture de l'heresie, qu'elle fasse perdre le goust des opinions fades de ce temps, & qu'elle garde soigneusement les gages & priuileges dont elle est honnoree. C'est la premiere pairie de la couronne, la premiere nourrice des Roys Chrestiens; & si elle a de special, qu'au temps de la reduction du pays il fut traicté & expressement capitulé: Que tous les Seigneurs, Gétilshommes, & subiects seroyent maintenus & conseruez en la Religion Catholique, Apostolique & Romaine, sans aucun changement à l'aduenir. Que si le Roy Loys XI. eust esté tant peu que ce soit suspect d'heresie, ils se fussent plustost faits creuer deuant que de se rendre & assubiectir à sa domination.

Belle leçon pour ceux qui troublent
la

la Prouince, & pires que viperes deschi-
rent le ventre de leur mere, la pillent, la
volent & rauagent:lesquels seroyent par
moy mōstrez au doigt, depeints de leurs
couleurs,& raportés par nom & surnom
pour estre diffamés à perpetuité, degra-
dés du titre de Noblesse, & de l'honneur
des armes,tenus pour ingrats,desloyaux,
& ennemis publics de l'Eglise, & de leur
patrie , n'estoit l'esperance de leur pro-
chaine conuersion. Quel regret auroyent
ces preux Cheualiers vos Peres,vrais pil-
liers de la foy , si par les loix de nature il
estoit permis de reuiure,de veoir vos ra-
uages, d'ouyr les plaintes & gemissemēts
du pauvre peuple , & de le veoir tant
souffrir sous l'oppressiō de vos courses?
Nous auons aux villes vnies leurs tom-
beaux & sepulchres , ornés de leurs ar-
mes,trophees & escussions, nous sommes
depositaires des enseignes par eux gai-
gnees aux batailles contre les Hugue-
nots : ils ont eu louange de les combat-
tre à Dreux,Sainct Denis,Cognac,Mon-
contour,& d'auoir reprises les villes oc-
cupees par les Heretiques : & vous au-
rez le reproche de les suyure , de les assi-
ster,

ster, de leur commettre la garde des places, de veoir piller les Eglises, dependre les cloches, rançonner les villageois, voler les marchants, & faire pis que les estrangers n'ont fait.

Les choses toutesfois ne sont si desesperées qu'il n'y ayt moyen de recouurer vostre honneur, r'entrer en reconciliation, vous remettre en grace, & viure autant vnis que iamais. Le seul remede pour y paruenir, & adoucir l'aigreur des choses passées, sera que vous & tous bons François abiurent le party du Roy de Nauarre, luy courent sus, luy barrét le chemin à l'Estat, & que nous mourions tous plustost que de le laisser viure & regner.

Ouy, mais direz vous, il nous promet d'estre Catholique, il veut estre instruit, il demãde vn Concile general ou national : le voulez vous traiter pirement qu'un Barbare, ou Payen ? O promesses captieuses, parolles fardees, & excuses dangereuses ! Faut il que les hommes se fient à celuy qui trompe Dieu ? Faut il s'asseurer à la foy de celuy qui l'a si souvent faussee ? Quelle esperance donne il d'estre Catholique, de faire la guerre aux

meilleurs Catholiques ? de chasser les Prestres, Chantres & Chapelains du feu Roy, pour retenir des Ministres près de luy ? de quitter la Messe pour aller au presche ? d'enuoyer du Harlay Sansi vers les Protestans, le Conseiller Lubert aux Suisses Huguenots, & receuoir à Dieppe les Ambassadeurs d'Angleterre ? Quel acte a il fait de sa pretendue Catholicité depuis la mort du Roy, sinon que d'assister à ses obseques, & d'accôpagner son corps iusques au portail de l'Eglise saint Sulpice à Cōpienne, sans vouloir entrer dedans, au mēpris du lieu, scandalle des Catholiques, & avec grand plaisir pour les Huguenots ? De mettre en ieu qu'il veuille estre instruit auparauant, c'est vne finesse trop lourde. Car la foy est vn don de Dieu, qui ne s'apprend point par leçons & remonstrances : l'ignorance y profite plus que le sçauoir, & la simplicité plus que la doctrine. Les Turcs sont receus au baptesme, & les Payens au Christianisme, non par discours d'vne prudence humaine: mais par grace & faueur diuine.

L'on luy a enuoyé autrefois de bon pedagogues & sçauāts Docteurs: mais il a esté

a esté si mauuais escolier, qu'il n'a rien voulu apprendre ny retenir : il n'a pas laissé de se remettre à la fange de ses mauuaises opinions avec vne recheute plus d'agereuse que sa premiere maladie. Et si d'ailleurs, demandant d'estre instruit, cela montre qu'il doute de sa creance, & qu'il vit en incertitude de foy: c'est à dire qu'il vit en impieté, mespris & contemnement de toutes Religions, puis qu'il confesse estre en scrupule à laquelle des Religions il se tiendra.

D'auoir sur ce poinct vn Concile pour sçauoir quelle Religion sera la meilleure, plus solide, & veritable, voyez le grand & horrible blaspheme. Ne sçauiez vous pas que les Conciles generaux ne se font iamais en l'Eglise, que par la licence, & sous l'authorité du Pape? Et toutesfois le Roy de Nauarre luy est ennemy iuré, & persequiteur de son siege. Il en fait si peu d'estat par sa declaration maguieres publiee, que parlant avec l'impudence ordinaire aux Heretiques, il promet que dans six mois il fera tenir vn Concile & les Estats generaux.

Ce n'est ny à luy, ny à Monarque du monde d'vser de ces termes, & parler en

telle façon. Il faut se soubmettre, & venir à sa Saincteté par prieres, demandes, & supplications, à ce qu'il luy plaise permettre le Concile, & non pas s'arroger le pouuoir de le faire tenir. Mais il est bien loing de son compte, son delay de six mois est trop court pour vne si solennelle conuocation.

Il faut premierement sçauoir s'il est receuable de le demander, & raisonnable de luy accorder. L'vn & l'autre ne se peuuent faire: car les Conciles ne peuuent estre legitimement demandez, & moins accordez, sinon quand l'heresie est en sa naissance, & qu'elle commence à pulluler. Que s'il y a iugement & condamnation, il s'y faut arrester sans contredict, & passer par là: autrement ce seroit donner occasion de la fomenter & entretenir: ce seroit en souffrir l'accroissement, & douter de la validité du iugement. L'Eglise ne peut faillir, ses iugements sont incorruptibles, & non subiects à appel ou reuision: elle neq fait iamais rien par surprise, ou par erreur de faict ou de droit.

Or est il que l'Heresie du Roy de Nauarre, & de tous les Calvinistes a esté

reiettee

feiettee & condamnée par le Concile de Trente, concile legitime, receu, & approuué, pour la doctrine & articles de la foy: si legitime qu'aux Estats derniers de Bloys la publication en a esté accordée & requise par les trois ordres. Par ainsi c'est vn abus de parler d'un Concile. Que si le iugement de son heresie estoit à faire, ne pensez pas que par vn Concile general le Roy de Nauarre & ses adherants fussent meilleurs: Car Arius apres sa condamnation faicte au Concile de Nicee ne laissa pas de pis faire. La resolution du Concile de Constantinople contre les Macedoniens, n'estaignit pas leur erreur. Nestor Euesque de Constantinople ne fit aucun compte du seuerer iugement donné contre luy au Concile d'Ephese. Les Manichees apres le Concoile de Chalcedoine continuerent leurs impures & sacrileges opinions. Comme seroit il possible de les vaincre & faire taire par conciles, veu que l'Escripture Sainte, la pure parolle de Dieu, & la doctrine des Saints Peres, sur quoy la resolution des Conciles doibt estre prise, ne leur sert que de scandale, les rend ob-

stinez & augmente leur impudence. C'est pourquoy l'esperance est perdue de les auoir par vn Concile general. Quant au national il ne se fait que pour les meurs & non pour les profonds mysteres de la Religion.

Tellement qu'il est bien facile à veoir que les pretextes du Roy de Nauarre, ne sont que pieges pour attraper les ignorants & deceuoir les simples. Il fait mines de presenter le pain d'une main, & il a la pierre en l'autre pour nous frapper durement. Sachez que la plus fine esmorce de l'Heretique c'est de beaucoup promettre & contenter tout le monde de belles parolles: mais son naturel est de ne rien tenir, & quand il est le maistre se rire & moquer de ceux qui l'ont creu. Contentez vous d'en estre aduertis, & gardez vous de l'experimenter. Je ne parle point d'un autre pretexte pris sur la vengeance de la mort du Roy. Il est trop grossier, estoienné de raison, & contraire au Christianisme. C'est folie de s'armer contre le Ciel, & se bander contre Dieu, & par forces humaines combattre ses diuins iugements.

Parainsi, Messieurs, reprenez vos meilleurs esprits, soyez sages de bonne heu-

re, fuyez la domination de l'Heretique, & croyez que c'est vne impieté de communiquer avec ceux qui esleuent vn autel prophane, & plantent vne chaire adultère, pour faire teste avec leurs sacrifices nouveaux au Prestre esleu en l'Eglise du iugement de Dieu.

C'est l'aduis de S. Cyprian: c'est le conseil de l'Eglise vniuerselle, c'est la leçon des anciés Docteurs, & la resolution des saints Peres. Le zele de vostre Religion vous oblige à les croire, vos consciences vous le commandent, nostre commune alliance au baptesme vous y femond, la France vostre mere crie apres vous de ne la point laisser au besoing, & vous coniu-re pour vn dernier coup de luy estre fidelles, legitimes, & obeissants enfans.

Si vous le faictes, la Religion sera exaltée, la paix vous sera donnée, la iustice reprendra son autorité, le commerce sera remis en son train, la terre rendra son fruit, vous aurez abondance de tous biens & viurez en prosperité.

Sinon, où vous ferez le contraire, où vous suyuez le party du Roy de Nauarre, & de ses adherants, vos guerres continueront, la peste, famine, & disette vous destrui

destruiront : vous planterez la vigne , & la cultiuerez, & n'en boirez point: toutes afflictions vous saisiront: toutes maledictions, playes & maladies escrites au liure de la loy vous suyuront: & de subiects que vous estes d'un grād, libre, tres-chrestien , & fleurissant Royaume, vous ferez esclaves de l'Herésie , proye à l'estranger , & viurez reduicts sous le ioug d'une seruitude insupportable aux François.

De Djion , ce premier de Septembre, 1589.


AVX BOVRGVIGNONS,
HVICTAIN.


*Bourguignons dessalez par l'eau de l'Herésie,
A qui l'ambition, & l'Huguenot serment,
Sous un masque vengeur charment l'entendement,
Goustez un tant soit peu de ce sel ie vous prie:*

*Resallez vos esprits, & sages gardez bien
Que par faute de sel l'Heretique gangrene
Ne se glisse en vos cœurs: ains tousiours vous souuiene
Que le fide Chrestien ne valut iamais rien.*


I. B. D.



















THE
NEWBERRY
LIBRARY

